

Naalakkersuisut matumuuna Inatsisartut Suleriaasianni § 33 naapertorlugu aalajangiiffigisassatut siunnersuut manna saqummiuppaat:

**Namminersorlutik Oqartussat upalungaarsimanermut inatsisip Kalaallit Nunaannut atuuttussanngortinneqarnera pillugu kunngikkormiut peqqussutaannut akuersinissaat pillugu Inatsisartut aalajangiiffigisassaattut siunnersuut**

(Pinngortitamut, Avatangiisinut Nukissiuuteqarnermullu Naalakkersuisoq)

**Siullermeerneqarnera**

**Tunngavilersuut**

Kunngikkormiut peqqussutaanni danskit upalungaarsimanermut inatsisaata ilaanik Kalaallit Nunaannut atuuttussanngortitsinissaq siunertarineqarpoq. Pingaartumik § 24-p aamma § 26-p atulersinneqarnissaat kissaatigineqarpoq. Paragrafit marluusut taakku naalagaaffimmi oqartussaasut suliassa qarfinnut suli tiguneqanngitsunut akisussaaffeqarnerannut tunngasuupput.

Upalungaarsimanermut inatsisip Kalaallit Nunaannut atuuttussanngortinneqarnera pillugu peqqussut 2010-mi Upalungaarsimanermut Inatsimmut Nassuiaammi inassuteqaatit malitsigaat, tassanilu immikkoortortanut akisussaaffeqarnerup Kalaallit Nunaanni atuutsinneqalernissaa inassutigineqarpoq.

Namminersorlutik Oqartussat suliassa qarfianni immikkoortunut akisussaaffeqarneq uuma akuersissutigineratigut akuerineqareerpoq: *Kalaallit Nunaanni annaassiniarnissamut upalungaarsimaneq aamma ikuallattoornissamik qaartoornissamillu pitsaaliuinermi iliuusissat pillugit Inatsisartut inatsisaata allannguuteqartinneqarnissaanik Inatsisartut inatsisissaannut nr. 14, 3. december 2012-imeersoq. (Sorsuttoqarnerani sorsuttoqarnissaanullu aarlerinartoqarnerani pilersaarusiornissamut aalajangiisinnaatitaaffiup tiguneqarnissaa).*

Suliassa qarfinni tiguneqarsimannngitsuni immikkoortunut akisussaaffeqarneq naalagaaffimmi oqartussaasunit attuumassutilinnit isumagineqarpoq. Tamanna danskit upalungaarsimanermut inatsisaanni allassimavoq, taamaattumillu Kalaallit Nunaannut atuuttussanngortinneqartariaqarluni. Upalungaarsimanermut inatsisip Kalaallit Nunaannut atuutsinneqalernissaata tungaanut inuinnarni upalungaarsimaneq pillugu inatsit nr. 342, 23. december 1959-imeersoq (kunngikkormiut peqqussutaatigut 1962-imi atuutsinneqalersoq) naalagaaffimmi oqartussaasut Kalaallit Nunaanni pilersaarusiortarnerinut atuutissaaq. Inatsit taanna naalagaaffeqatigiit iluanni allani atuukkunnaarsimavoq, taamaattumillu upalungaarsimanermut inatsisip Kalaallit Nunaannut atuuttussanngortinneqarnera pillugu peqqussummut Inatsisartut akuersinissaat inassutigineqarpoq.

**Pisortanut aningaasaqarnermut allaffissornermullu sunniutissat**

Peqqussut danskit oqartussaasuisa pisussaaffiitut tunngasuuvoq, taamaattumillu Namminersorlutik Oqartussanut sunniuteqassanngilaq.

**Inuussutissarsiortunut namminersortunut aningaasaqarnermut allaffissornermullu sunniutissat**

Peqqussut inuussutissarsiortunut namminersortunut sunniuteqassanngilaq

**Innuttaasunut aningaasaqarnermut allaffissornermullu sunniutissat**

Peqqussut innuttaasunut sunniuteqassanngilaq.

## **Tusarniaaneq**

Illersornissamut Ministereqarfiup kunngikkormiut peqqussutaata tusarniaassutigineqarnera isumagaa, taannalu 2015-imi decembarimiit 2016-imi januaarimut attuumassutilinnut tusarniaassutigineqarpoq. Statsministereqarfik, Inatsisnik Atuutsitsinermut Ministereqarfik aamma Illersornissamut Ministereqarfik, kiisalu Pinngortitamut, Avatangiisinut Nukissiuuteqarnermullu Ministereqarfik tusarniaaffigineqarput.

## **Ilanngussat**

1. Upalungaarsimanermut inatsisip Kalaallit Nunaannut atuuttussanngortinneqarnera pillugu peqqussummut missingiut